

Kapítulo 7

E OTRO BUKINAN SAGRADO DI MORMONISMO

Fuera di e *Buki di Mormon*, tin tres otro buki ku Iglesia di e Santunan di e Deláster Dianan ta konsiderá sagrado.

I. DOKTRINA I ALIANSANAN

E di dos buki ku mormonnan ta konsiderá skritura igual ku Beibel, ta e buki *Doktrina i Aliansanan*. E buki tin 136 sekshon, òf kapítulo, konteniendo solamente supuesto revelashonnan i vishonnan di "profeta" Hosé Smith. Un eksepsion ta kapítulo 136, ku ta presidente Brigham Young su revelashon. Tambe tin un agregashon di parti di presidente Wilford Woodruff di año 1890 prohibiendo poligamia.

Nan a publiká e buki aki, ku ta kontené revelashonnan di diferente doktrina mormon, na 1833 ku e título Book of Commandments (Buki di Mandamentunan). Segun Joseph Fielding Smith, di dies presidente mormon, e buki su revelashonnan ta harmonisá ku tur doktrina mormon. "No tabatin nesesidad di eliminá, kambia òf korehí qualke parti pa hasié kuadra; ma kada revelashon nobo tokante doktrina i saserdosia a kuadra perfektamente na su lugá pa kompletá henter e struktura prepará pa e Arkitekto Eksperto."¹ E apòstel mormon, John A. Widtsoe a bisa ku e revelashonnan "no a wòrdu kambiá. No tabatin mòrsmentu ku Dios Su palabra."²

E *Buki di Mandamentunan* mes ta indiká ku lo no tabatin nodi di hasi kambio debí ku e ta un buki inspirá pa Dios:

"Studia e mandamentunan aki, pasobra nan ta bèrdat i fiel, i e profesianan i promésanan den nan, lo ta kumplí. Loke ami Señor a papia, mi a papia, i lo mi no despensá mi mes, pasobra maske shelu i tera pasa, mi palabra lo no pasa..." (*Buki di Mandamentunan* 1:7).

Ta rasonabel pa pensa ku ora Dios ta papia, no tin nada pa hende agregá òf kita. Segun siñansa mormon, e revelashonnan den e *Buki di Mandamentunan* ta duná pa Dios Mes. Pues nos lo a asumí ku e *Buki di Mandamentunan* lo a keda méskos maske su nòmber a kambia pa *Doktrina i Aliansanan* na año 1835. Pero esei no ta e kaso. Ora nos ta kompará un kopia aktual di *Doktrina i Aliansanan* ku e *Buki di Mandamentunan* no tin duda ku kambionan importante a ser hasí. Hosé Smith mes a hasi hopi di e kambionan segun e historiadó mormon, B.H. Roberts:

"...algun di e promé revelashonnan publiká promé den e 'Buki di Mandamentunan,' na 1833, a keda revisá pa e Profeta mes pa korigí erornan di e eskribanan i publikadónan; i algun frase adishonal a keda agregá...i paragrafnan agregá pa hasi e prinsipionan òf instrukshonnan apliká na ofisialnan

ku no tabata den iglesia tempu ku algun di e revelashonnan promé tabata duná."³

No ta straño si José Smith a korigí i aklará e revelashonnan. Pero loke si ta straño ta ku el a kambia algun revelashon por komplete, dunando un otro nifikashon. David Whitmer, un di e tres testigunan original di e *Buki di Mormon*, a skirbi:

"Agun di e revelashonnan manera nan ta aktualmente den e buki di Doktrina i Aliansanan a wòrdu kambiá i agregá. Algun di e kambionan ta di suma importansia komo ku e nifikashon tabata kambiá por komplete tokante algun asunto mashá importante; ta komo si fuera Señor a kambia di opinion algun aña despues ku el a duna e revelashonnan i despues di duna òrdu na su sirbidó pa imprimí nan den e "Buki di Mandamentunan...E revelashonnan tabata imprimí korekto den e Buki di Mandamentunan! Mi sa esaki...José i iglesia a risibí komo un publikashon korekto. Mi sa esaki. Ma durante wenter di 1834 nan a ripará ku mester kambia algun revelashon den e Buki di Mandamentunan, pasobra e lídernan di iglesia a bai muchu leu, i a hasi kos mas aleu ku algun di e promé revelashonnan [a pèmití]. P'esei e buki Doktrina i Aliansanan a keda imprimí na 1835, i algun di e revelashonnan kambiá i agregá."⁴

Na un otro okashon Whitmer a bisa:

"...mi ta ripití ku mi tabata presente ora hermano José a risibí e revelashon aki pa medio di e piedra: ...mi sa ku siguransa ku el a wòrdu kambiá ora el a wòrdu impremí den e *Doktrina i Aliansanan*..."⁵

Doktrina i Aliansanan lo mester ta e buki mormon mas puru i ku ménos revishon komo ku e ta konsistí di revelashonnan dirèkt for di Dios i no tabatin mester di tradukshon manera tabata e kaso ku e *Buki di Mormon*. Tòg e lídernan mormon a mòrs hopi ku e buki aki i a agregá i kita hopi informashon. Ta klaro ku un buki asina no ta inspirá pa Dios!⁶

II. E PERLA DI GRAN PREIS

E buki *Pèrla di Gran Preis* ta konsistí di kuater diferente sekshon. E promé ocho kapítulonnan ta entitulá "E Buki di Moises," i ta un relato di e mésun periodo di tempu ku Génesis kapítulonnan 1-6 ta kubri den Beibel. Esaki ta sigui pa "E Buki di Abraham," ku supuestamente a wòrdu tradusí for di dokumentonan antigwo di Egipto. E buki aki ta kontené sinku kapítulo i tres pintura. Despues por haña un otro buki, ku ta konsistí di dos kapítulo, entitulá "Skirbimentunan di José Smith." E promé kapítulo ta Smith su "tradukshon" di Mateo 23:39 te 24:51. Kapítulo dos ta Smith su tèstimonio personal di e sirkunstansianan bou di kua el a haña e táblanan di oro for di kua el a "tradusí" e *Buki di Mormon* i a introdusí e religion mormon. Por último e buki aki ta kontené e "Artíkulonnan di Fe," esta kredo di e Iglesia di Hesukristo di e Santunan di e Deláster Dianan (loke nos a mira den kapítulo sinku di e buki aki). E artíkulonnan aki, skirbí pa José Smith, te ainda ta válido pa iglesia mormon.

Nan a agregá dos "revelashonnan" adishonal na e buki aki dia 3 di aprel 1976. Un di e "revelashonnan" ta José Smith su vishon di e reino selestial.

Tin problema serio ku e buki aki tambe. Nos lo konsentrá riba e "Buki di Abraham." Segun Iglesia di Santunan di e Deláster Dianan, nan a haña poseshon di e buki aki di e sisuiente forma. E franses, Antonio Sebolo, a deskubrí un kaha di morto di un momia na Egipto. Ora señor Sebolo a fayesé, e kaha a pasa pa Michael H. Chandler, ku a habri'é i a deskubrí dos ròl

antigwo huntu ku e momia. Ora José Smith a tende esaki, el a kumpra e momia i e dos ròlnan for di señor Chandler na año 1835. Smith a tradusí e ròlnan di 4.000 año i a deklará ku nan a kontené e skirbimentu di Abraham—su propio man—i su bisañeto di Abraham, José. El a deklará ku e "Buki di Abraham" ta un buki mas bieu ku Génesis, i a publiká su tradukshon na año 1842 huntu ku tres pintura ku e ròl tabata kontené. Kontrali na e tablanan di e *Buki di Mormon*, José Smith a mustra e ròl aki na hopi hende.

Ora José Smith a muri, mayoria mormon a muda pa estado di Utah. Pero ni Smith su biuda ni su mama a kompañá nan i komo resultado, iglesia mormon a pèrde poseshon di e ròlnan. No tabata te 27 di novèmber 1967 ku e Santunan di e Deláster Dianan a anunsia ku nan a bolbe haña e ròlnan antigwo. (Tin sospecho serio ku iglesia mormon a skonde nan tur e tempu aki.)

Hosé Smith a hasi su deklarashonnan tokante e "Buki di Abraham" den un era ku ekspertonan di idioma egipsio tabata masha skars. Pero ku e deskubrimentu di e ròlnan di nobo, a bin e pusibilidad di hasi un evaluashon di Smith su abilidad di tradusí e idioma antigwo aki.

Iglesia mormon a pidi Dr. Hugh Nibley, un mormon di Universidat Brigham Young, pa tradusí "Buki di Abraham." El a atmití ku e no tabata sa basta di idioma egipsio i a sugerí profesor Dee Jay Nelson, un mormon eksperto di idioma egipsio pa hasi e tradukshon. Nelson a bai di akuerdo basta ku e iglesia mormon lo publiká su tradukshon.

Señor Nelson a deskubrí ku José Smith a inbentá e storia tokante Abraham. E ròl no tabatin nada di hasi ku Abraham, tampoko a kontené skirbimentu di Abraham ni di José. Alkontrario ekspertonan a yega na konklushon ku e ròl tabata parti di e "Buki di Roséa," un sekshon den e "Buki di Mortonan." Tabata kustumber di egipsionan pa pone e "Buki di Rosea" den kaha di morto òf serka graf pa e defunto por hañ'e. E buki a kontené diferente rito mágiko ku lo por yuda e defunto den su bida despues di morto. Esaki ta skirbimentu di hende masha superstisioso. Nòmber di hopi dios di Egipto a bin dilanti den e ròl, ma nada tokante e Dios di Abraham.

Tambe a sali na kla ku mormonnan a hasi kambio den sigur un di e pinturanan—potrèt di un saserdote pagano sakrifikando Abraham riba altá, segun José Smith. Pero en bèrdat e pintura tabata un ilustrashon for di e buki ku a kompañ'e.

Ora Dee Jay Nelson a kaba su tradukshon, el a laga dos otro eksperto di idioma egipsio, Profesor Richard A. Parker di Universidat Brown i Klaus Baer di Universidat di Chicago, chèk su tradukshon. Nan a komprobá ku Nelson su tradukshon tabata korekto, i pues ku José Smith su storia tokante di Abraham tabata puru mentira. Ta opvio ku Smith no tabatin ningun abilidad pa tradusí skirbimentu egipsio, ni ku abilidad humano ni ku su supuesto revelashonnan. Iglesia di e Santunan di e Deláster Dianan sinembargu a nenga imprimí Nelson su tradukshon. Dee Jay Nelson i su famia a manda un karta fechá 8 di desèmber 1975, pa e promé presidensia di iglesia mormon tumando nan retiro, bisando entre otro "Nos no ke asosia ku un organisashon religioso ku ta siña mentira..."

Ta klaro ku e Buki di Abraham ta solamente un fabrikashon mentiroso for di José Smith su imaginashon. Asta hopi mormon ta rechasa e Buki i Abraham awendia. Ma iglesia mormon ta nenga atmití ku e buki ta un ngaño. Dia 4 di mei 1970, a sali den e korant, *Salt Lake Tribune*: "E promé Presidensia di e Iglesia di Hesukristo di e Santunan di e Deláster Dianan ta asepta e 'Buki di Abraham' komo 'skritura duná na nos pa medio di e Profeta (José Smith).'"⁷

Esaki ta lamta algun pregunta. 1) Si e "Buki di Abraham" ku ta forma 25% di e buki *Pèrla di Gran Preis* ta un baka di mentira, kiko di sobrá di e *Pèrla di Gran Preis*? 2) Segun Smith e blachinan for di kua el a tradusí e *Buki di Mormon* a kontené skirbientu egipsio. Nunka ekspertonan di e idioma aki a haña oportunidat a kompara Smith su "tradukshon" ku e plachinan original. Ma den e kaso aki ku nan por a evaluá Smith su abilidad pa tradusí idioma egipsio, nan a yega na konklushon ta ku José Smith ta un gañadó formal. Si Smith su tradukshon" ku por

wòrdu inbestigá ta probá di ta un mentira, ta lógiko pa duda José Smith su abilidadat pa tradusí e supuesto plachinan for di kua e *Buki di Mormon* a originá.

III. BEIBEL

Kiko ta iglesia mormon su punto di bista di Beibel? E di ocho artíkulo di fe di e Iglesia di Hesukristo di e Santunan di e Deláster Dianan ta bisa "Nos ta kere ku Beibel ta palabra di Dios basta ku e ta tradusí korekto; nos ta kere ku e *Buki di Mormon* ta palabra di Dios." Implikashon kla di e deklarashon aki ta ku Beibel ta palabra di Dios, pero e tin eror. Joseph Fielding Smith, Jr., yu di e di dies presidente di iglesia mormon, a bisa di kristiannan di pasado, "E promé 'tatanan ku a desviá di e bèrdat' no a haña ku tabata robes pa mòrs ku skritura inspirá. Si a parse ku kualke skritura lo pone nan punto di bista na peliger, nan a kambí'è, transplant'è òf kompletamente kit'è for di e teksto bíbliko."⁸ Pa ta mas presis, mormonnan ta akusá Iglesia Katóliko Romano di hasi hopi kambio den Beibel "... miéntras e tabata limitá na e Iglesia ei— mas òf ménos entre añanan A.D. 460 te 1400."⁹ Pa e motibu fabriká ei, nan ta deskonfiá Beibel. E apòstel mormon, Orson Pratt, a skirbi:

"...Beibel den...tur e idiomanan di mundu, ku eksepshon di e original na kua el a wòrdu duná, no ta palabra di Dios, sino palabra di traduktornan no inspirá ...ningun parti di Beibel por ta konosí pa nan, ku siguridat, komo palabra di Dios."¹⁰

Na aña 1947, nan a deskubrí ròlnan antigwo den serkania di Laman Morto na Israel, fechá entre 100 P.K. (promé ku Kristu) i 68 D.K (despues di Kristu). E tekstonan aki, kopiá siglonan promé ku mormonnan ta bisa ku Iglesia Katóliko Romano a kambia e palabranan di Beibel, ta indiká kla ku e teksto a keda kasi idéntiko. Esei kier men ku no ta bèrdat ku katólikonan a hasi e kambionan di kua nan ta akusá i pues e teksto ku nos tin aktualmente ta sumamente konfiabel i kasi no ta kontené eror mes. E ròlnan antigwo di Laman Morto ta hinka mormonismo den pèrtá. Beibel ta kondená diferente siñansa i práktika mormon, i awor nan no por kambia e teksto segun nan ta haña ta bon pa bula pipa.

Hosé Smith no solamente a siña ku tin eror den Beibel, ma tambe el a purba korigí Beibel. Na aña 1831, na Kirtland, Ohio, el a kuminsá tradusí Beibel di nobo, konosí komo "E Tradukshon Inspirá di Beibel" òf "Vershon Inspirá". Segun e outor mormon, John A. Widtsoe, "Profeta José Smith, desde komienso di su ministerio, a dediká tempu pa revisá pasahenan di Beibel ku tabata tradusí ínkorekto òf tradusí di tal forma ku e nifikashon a keda skondí."¹¹ Bruce R. McConkie, un otro outor mormon, mormon, a skirbi tokante e *Vershon Inspirá*:

"...segun mandamentu di Señor i miéntras e tabata aktua bou spiritu di revelashon, e Profeta a korigí, revisá, kambia, agregá, òf ekskluí for di Vershon King James di Beibel pa forma loke ta konosí awor komo e Vershon Inspirá di Beibel...e inundashon di lus maravioso i konosementu revelá pa medio di e Vershon Inspirá di Beibel ta un di e evidensianan mas grandí pa José Smith su mishon divino."¹²

Segun e outornan aki, José Smith solamente a revisá i akclará e Skrituranan. Ma esei no ta loke a sosodé en bèrdat? Smith no a studia e tekstonan antigwo di Beibel pa hasi kambionan mas korekto ku ta pusibel. José Smith a hasi su "revishon" di Beibel sin konosementu di e idiomanan di Beibel, esta hebreo i griego. (El a siña e idiomanan aki despues.) Ekspertonan di e idiomanan bíbliko ta invertí añanan pa tradusí Skritura, ma Smith, sin konosé e idiomanan aki, a logra hasié den tres aña. Ta klaro ku José Smith su "revishon" no ta loke mormonnan ta pretendé ku e ta. En realidat Smith a skirbi sierto sekshon di Beibel kompletamente di nobo

segun el a haña ta bon. Pa skonde e echu ei, mormonnan ta bisa ku Smith a tradusí Beibel pa medio di revelashon dirèkt for di Dios. Pa e lektor por haña un idea di su revishon, diferente ehèmpel di José Smith su kambionan sin base tekstual ta presentá:

- El a kambia Génesis kapítulon 1 i 2 pa duna impreshon ku Dios a papia esaki dirèkt ku Moises. "I a sosodé ku Señor a papia ku Moises, bisando: Ata, lo mi duná bo un revelashon tokante e shelu aki i e tera aki; skirbi e palabranan ku Mi ta papia. Ami ta e Kuminsamentu i e Fin, e Dios Todopoderoso; pa medio di Mi Uniko Yu Mi a krea e kosnan aki; si, na prinsipio Mi a krea shelu i e tera riba kua bo ta para...I Ami, Dios, a bisa, 'Laga tin klaridat.'" Por nota kambionan visto ora ta kompará e palabranan aki ku Génesis 1:1-3.
- José Smith a agregá na e relato di Génesis 3 ku Satanas a presentá dilanti Dios i a ofresé pa wòrdu mandá na mundu pa salba hende. Ora Dios a skohe Hesus pa e taréa aki, Satanas a rebeldiá kontra Dios.
- José Smith a inkluí den su "tradukshon" di Tèstament Bieu siñansa i práktikanan kompletamente desconosí te era di Tèstament Nobo. Por ehèmpel den Génesis 6:52-53,67 den Vershon Inspirá (VI); Adam a batisá pa medio di inmershon "...den nòmber di mi Uniko Yu...Hesukristo, e úniko nòmber ku ta duná bou di shelu, pa medio di kua salbashon lo bin na e yunan di hende; i boso lo risibí e don di Spiritu Santu..." Nòmber di Hesus no tabata konosí te ku Gabriel a anunsiá esaki na Maria i José (Lukas 1:31 i Mateo 1:21) miles di aña despues di Adam.
- Smith a agregá hopi siñansa mormon den e promé kapítulon di Génesis, por ehèmpel e pre-eksistensia di tur alma humano (Génesis 2:6,9 den VI); e doktrina ku si hende no a hasi piká, nan lo no por haña yu (Génesis 6:56, VI); ku yunan di Kanaan a bira pretu komo kastigu pa nan piká (Génesis 7:10,14,29 VI).
- Smith su Vershon Inspirá ta agregá mas ku 800 palabra (entre otro un profesia di e *Buki di Mormon*) den Génesis 50. Asta el a inventá un profesia tokante su mes persona: "I e miradó lo mi bendishoná...i su nòmber lo ta yamá José, i esei lo ta nòmber di su tata...pa trese mi puebel na salbashon" (Génesis 50:33, VI).
- E Vershon Inspirá a ekskluí e buki di Kantika di Salomon.
- Juan 1:1 a ser trosé segun José Smith su smak den Vershon Inspirá: "Na prinsipio tabata e evangelio prediká pa medio di e Yu. I e evangelio tabata e palabra, i e palabra tabata ku e Yu, i e Yu tabata ku Dios, i e Yu tabata di Dios."

Nos por duna otro ehèmpel di Smith su kambionan di Beibel, ma esakinan ta duna un idea di Smith su práktika di kita i agregá sin eskrúpulo na Skritura santu segun el a haña ta bon.

Segun José Smith, via un revelashon Dios a dun'é i Sidney Rigdon e tarea pa "revisá" Beibel. Ta parse ku nan a stòp e proyekto aki pa un tempu. Anto Smith a haña un revelashon: "Awor, di bèrdat mi ta bisa boso mi sirbidornan, José Smith, Jr. i Sidney Rigdon, Señor ta bisa, ta nesario pa boso tradusí atrobe...sigui e trabou di tradukshon te ora e ta kompletá" (*Doktrina i Aliansanan* 73:3-4). Apesar di instrukshon tan kla, supuestamente duná pa revelashon, tòg iglesia mormon te awe nunca a imprimí e Beibel aki. I maske e sekta mormon, Iglesia Reorganisá di Hesukristo di e Santunan di e Deláster Dianan, si a publik'é na aña 1867¹³

tòg iglesia mormon ta nenga us'é. Maske lídernan di mormonismo ta deklará abiertamente ku nan ta aseptá e kambionan ku Hosé Smith a hasi, tòg e Beibel ofisial di e Iglesia di Hesukristo di e Santunan di e Deláster Dianan ta e tradukshon ku Hosé Smith a konsiderá tan malu, e vershon King James, publiká na año 1611. Joseph Fielding Smith a skirbi lo siguiente tokante Hosé Smith su "revishon" di Beibel:

"Motibu ku e Iglesia di Hesukristo di e Santunan di e Deláster Dianan no a publiká henter e teksto [di e Vershon Inspirá di Beibel] no ta pa motibu di falta di konfiansa den e integridat di Hosé Smith, òf duda ku e tantísimo adishonnan i kambionan ku no ta den e Vershon Outorisá di Beibel (Vershon King James) ta korekto. Miembronan di e Iglesia ta aseptá tur esakinan kompletamente i e adishonnan komo duná pa revelashon divino na e Profeta Hosé Smith."¹⁴

Den un otro buki e mésun outor ta bisa tokante Hosé Smith su Beibel revisá "...tur ku el a hasi ta un yudansa grandi pasobra e erornan prinsipal a wòrdu korigí."¹⁵ Si e Vershon Inspirá di Hosé Smith ta muchu mas mihó ku tur otro tradukshon di Beibel, pakiko iglesia mormon ta sigui usa e tradukshon di Beibel King James ku nan profeta inspirá a konsiderá un tradukshon inferior i yen di eror?

Mormonnan ta haña nan den pèrtá riba e punto aki. Nan ta afirmá ku Hosé Smith a hasi su revishon pa revelashon di Dios. Pues si nan rechasá Smith su obra "inspirá", nan ta atmití ku Hosé Smith tabata un mentiroso. Ma di otro banda e Vershon Inspirá tin siñansa ku mormonismo aktual no ta aseptá. P'esei iglesia mormon ta deklará ku Hosé Smith no a kaba e revishon i p'esei nan no ta imprimí e Vershon Inspirá.¹⁶ Pero Hosé Smith mes a skirbi den un karta dia 2 di yüli 1833: "E dia aki nos a kaba e tradukshon di Skrituranan, pa kua nos ta gradisí nos Tata Selestial..."¹⁷ Asta si tabata e kaso ku Hosé Smith no a kompletá su tarea, ainda mormonismo lo mester splika dikun nan ni sikiera a publiká e "korekshonnan" di Beibel, ma ta sigui usa un tradukshon, ku segun nan ta kontené hopi eror?

Ora Outor di Beibel, Hesus, a kana riba e mundu aki E ni sikiera a kambia un palabra di Skritura. Alkontrario, El a bisa: "...Skritura no por wòrdu kibrá" (Juan 10:35) i "ta mas lihé pa shelu i tera kaba ku un punta di lei kai" (Lukas 16:17). Pero mormonnan ke sa ku nan ta mas sabí ku Hesus i ta kambia Beibel segun nan smak. Joseph Fielding Smith, di dies presidente di e Iglesia di Hesukristo di e Santunan di e Deláster Dianan, ta reda nan aktitut pa ku Beibel: "Guiá pa e *Buki di Mormon, Doktrina i Aliansanan*, i Spiritu di Señor, no ta difísil pa diserní e erornan den Beibel."¹⁸

IV. OUTORIDAT FINAL DI MORMONISMO

Komo ku Dios a krea hende, komo ku E ta stima hende ku un amor etèrnu, komo ku E ta Dios for di etèrnidat pasado te den etèrnidat futuro, komo ku E ta soberano, p'esei Su palabranan ta outoridat final. Beibel ta Su palabranan i pues loke Beibel ta bisa ta loke e kreyente mester biba i kere. Beibel, i Beibel so, ta e úniko outoridat final pa hende.

Nos a mira kaba ku e skrituranan mormon ta konsistí di kuater buki: Beibel, *Buki di Mormon, Doktrina i Aliansanan*, i *Pèrla di Gran Preis*. Pero no e bukinan aki so ta konsiderá outoridat final pa mormonismo. E Iglesia di Hesukristo di e Santunan di e Deláster Dianan tambe ta pone hopi énfasis riba loke nan presidente aktual ta bisa.

Esaki ta lamta un pregunta importante. Realizando ku mormonnan tin kuater buki sagrado i e presidensia, kua buki òf persona tin preferensia òf outoridat final den kasonan ku siñansa di un ta kontradisí otro? (Manera nos a mira, esei sa sosodé)

Pa e kristian, tin un kontesta so: Beibel. Ma esei no ta kontesta di mormonismo. Nan Artíkulonon di Fe ta bisa: "Nos ta kere ku Beibel ta palabra di Dios basta ku e ta tradusí korekto;

nos ta kere tambe ku e *Buki di Mormon* ta palabra di Dios." Nota ku palabranan "basta ku e ta tradusí korekto" no ta apliká na e *Buki di Mormon* pasobra nan ta kere ku e *Buki di Mormon*, en kontraste di Beibel, si ta puru, sin eror, i por ta aseptá sin pregunta, komo palabra di Dios. Ta ópvio; *Buki di Mormon* tin preferensia riba Beibel. E apòstel mormon, Orson Pratt, a bisa: "E generashon aki tin mas ku mil bes mas evidensia pa demonstrá i establesé pa etèrnidat e Outoridat Divino di e *Buki di Mormon* ku en kontraste di Beibel!"¹⁹

E artíkulo di fe aki tambe ta pone doktrina mormon e outoridat ku ta determiná kiko "ta tradusí korekto" den Beibel. P'esei e mormon ta aseptá tur siñansa di Beibel ku ta kuadra ku nan doktrina; pero ta rechasá kualke siñansa di Beibel ku ta kontradisí nan doktrina komo un tradukshon inkorekto.

Ademas ta parse ku pa e "Santunan" tur otro buki mormon tin mas outoridat ku Beibel. Heber C. Snell, un direktor anterior di instituto mormon, a skirbi:

"Na 1830, ora nan a organisá e Iglesia, tabatin dos buki sagrado, Beibel i e *Buki di Mormon*...

Den kurso di dos dékada, Beibel a kai for di ta e promé di dos buki sagrado di Iglesia pa bira (solamente) un di kuater (buki sagrado). Tin indikashon ku awor el a baha te na e di tres òf asta di kuater puesto entre e bukinan sagrado di iglesia..."²⁰

Hopi hende ta pensa ku *Buki di Mormon* ta e buki ku tin preferensia riba tur otro buki den iglesia mormon. Ma esaki tampoko ta e kaso. *Buki di Mormon* no ta outoridat final pa e Iglesia di e Santunan di e Deláster Dianan.

Ta klaro ku mormonnan no ta haña nan doktrina for di *Buki di Mormon*. Tin hopi práktika i siñansa mormon ku no ta hañá den e *Buki di Mormon*. Dikon? Pasobra e religion ku José Smith a inbentá no ta duná pa revelashon di Dios. Alkontrario, e práktikanan i siñansanan mormon a bin dor di un proseso di evolushon, desaroyando poko poko. P'esei e *Buki di Mormon*, e promé buki di mormonismo, no ta inkluí e siguiente siñansanan ku mormon ta kere awendia:

- Dios un tempu tabata un hende pekaminoso ku a resusitá ku un kurpa físiko.
- Dios ta un tata, i tin un tata, welo, i bisawelo.
- Tin tambe un señora diosa.
- No tin kastigu etèrnu na fièrnu
- Kos material ta etèrnu—no tin kreashon, ni un Kreador.
- Matrimonio ta pa etèrnidat.
- Solamente poligamistanan por bira diosnan. (Esaki tabata siñá antes ma awor e siñansa aki ta "posponé.")
- Mester batisá pa mortonan.
- E saserdosia di Aaron i Melkisedèk, ansianonan, e setenta, e sumosaserdote, presidente di iglesia, promé presidensia (dos presidente huntu ku e presidente máksimo), presidente di bario, apòstelnan, obispo, èts.²¹

Mormonnan ta aseptá e siñansanan aki maske *Buki di Mormon* no ta kontené e siñansanan aki i asta ta kontradisí nan den diferente kaso. Esaki sigur ta indiká ku e *Buki di Mormon* no ta outoridat final pa mormonnan.

Ni Beibel ni e *Buki di Mormon* ta e outoridat final pa siñansa i práktika di e Iglesia di Hesukristo di e Santunan di e Deláster Dianan. Kiko anto di e otro dos bukinan mormon: e *Pèrla di Gran Preis* i *Doktrina i Aliansanan*? Maske ta opvio ku hopi doktrina mormon ta bin

for di *Doktrina i Aliansanan*—kisas mas ku tur otro buki—ta notabel ku e bukinan aki tampoko no ta outoridat final pa iglesia mormon.

Kiko òf ken ta e outoridat final pa mormonismo? E kontesta ta indeskutiblemente e liderato di e Iglesia di Hesukristo di e Santunan di e Deláster Dianan; espesialmente e presidente aktual di iglesia mormon (i su dos konsaheronan), ku tambe ta konsiderá komo "...un miradó, un reveladó, un traduktor, i un profeta" di e Iglesia di e Santunan di e Deláster Dianan "pose-éndo tur e donnan di Dios ku e ta duna na kabes di iglesia" (*Doktrina i Aliansanan* 107:92). Heber C. Kimball su spièrtamentu ta kla:

"...siña hasi loke bo a wòrdu bisá pa hasi, tantu hende bieu komo hoben; siña hasi loke bo a wòrdu bisá pa hasi pa futuro...

Si bo a wòrdu bisá pa bo líder pa hasi algu, hasié. No ta bo asunto si e ta bon òf malu."²²

Asta ta parse ku no ta importá si e deklarashon di e presidente aktual ta kontradisí loke otro profetanán i presidentenan mormon a bisa den pasado. Ora ansiano S. Dilworth Young a ser puntrá pa un definishon di revelashon moderno, su kontesta tabata: "Revelashon moderno ta loke Presidente José Smith a bisa, si Presidente Spencer W. Kimball no a bisa algu otro."²³ Den otro palabra, e deklarashonnan di José Smith ta loke ta konta. Pero si e presidente aktual di mormonismo ta haña un revelashon diferente for di esun di Smith, mester aseptá instrukshon di e presidente aktual. Brigham Young asta a deklará ku su mensahenan tabata igual ku Skritura, "Te ainda mi no a prediká un sermon i mand'é pa e yunan di hende, ku nan no por yama Skritura."²⁴

Ta klaro ku e bukinan "inspirá" di e iglesia mormon no ta outoridat final pa mormonismo.

V. E SKRITURANAN MORMON NO TA KOMPLETO AINDA

Ta interesante pa nota ku na aña 1976 *Desert News* a reportá ku: "Dos revelashon risibí pa presidentenan anterior di iglesia, a keda aseptá komo skritura djasabra atardi, 3 di aprel, pa voto di miembresia di iglesia..."²⁵ Un parti di e skritura nobo tabata un revelashon di José Smith. El a skirbi dia 21 di yanüari 1836:

"Shelunan a habri pa nos i mi a mira e reino di Dios selestial,...mi a mira tata Adam, i Abraham i Miguel i mi tata i mama, mi ruman Alvin..."²⁶

Pero iglesia mormon no a imprimí e revelashon aki manera e tabata skirbí originalmente. Nan a ekskluí e palabranan "i Miguel" sin duna splikashon òf komentario. Kiko tabata e motivashon pa kambia un revelashon ku supuestamente Dios Mes a duna? Simplemente pasobra segun un otro revelashon di José Smith, Adam i Miguel ta e mésun persona:

"I tambe ku Miguel, òf Adam, tata di tur, e prens di tur, e ansiano di dianan" (*Doktrina i Aliansanan* 27:11).

"I Señor a aparesé na nan, i nan a lanta i a bendishoná Adam, i a yam'é Miguel, e prens, e arkangel" (*Doktrina i Aliansanan* 107:54).

Komo ku esaki lo a kousa un problema teológiko pa Mormonnan, nan a kambia loke nan mes a yama "skritura"—inspirá pa Dios mes. Ta onesto pa kambia loke Dios a inspirá? Of kisas Dios ta kulpabel di hasi un kibokashon, ku hende por a korigí? En todo kaso, e Iglesia di Hesukristo di e Santunan di e Deláster Dianan a aseptá komo skritura inspirá, infalibel i sin eror, un revelashon ku nan mes ta rekonosé ku tin eror.

Beibel ta laga sa sin duda ku hende no tin outoridat pa kita òf buta aserka Palabra di Dios. Di bèrdat, Beibel ta kondená severamente tur esnan ku ta kita òf ta buta aserka Skritura. "...si un hende añaadí na nan, Dios lo añaadí na djé e plaganan ku ta pará skirbí den e buki aki; i si un hende kita for di e palabranan di e buki di e profesia aki, Dios lo kita su parti for di e palu di bida i for di e stat santu, kualnan ta pará skirbí den e buki aki (Revelashon 22:18-19; tambe lesa Deuteronomio 13:1-10). Mormonnan ta kulpabel di kita for di Beibel i agregá segun nan smak. I nan ta hasi méskos ku otro bukinan ku nan ta konsiderá sagrado—maske en realidat nan no ta inspirá.

-
- 1
 - 2
 - 3
 - 4
 - 5
 - 6
 - 7
 - 8
 - 9
 - 10
 - 11
 - 12
 - 13
 - 14
 - 15
 - 16
 - 17
 - 18
 - 19
 - 20
 - 21
 - 22
 - 23
 - 24
 - 25
 - 26